

Berita Harian April 2020

Bil.	Tarikh	Tajuk Berita	Catatan	Muka Surat
1	Khamis 2 April 2020	AGC belum jawab representasi Riza Aziz semak tuduhan pengubahan wang haram	1Malaysia Development Bhd (1MDB)	2
2	Khamis 2 April 2020	Perbicaraan kes 1MDB Najib bersambung 15 April	1Malaysia Development Bhd (1MDB)	4
3	Isnin 6 April 2020	Hujahan kes rasuah Isa Samad ditangguh ke 21 April	Suruhanjaya Pencegahan Rasuah Malaysia (SPRM)	6
4	Selasa 7 April 2020	Kes mahkamah Ahmad Maslan ditangguh ke 15 April	Suruhanjaya Pencegahan Rasuah Malaysia (SPRM)	8
5	Isnin 13 April 2020	PKP: Bicara kes 1MDB Najib ditangguh	1Malaysia Development Bhd (1MDB)	10
6	Rabu 15 April 2020	AS pulangkan AS\$300 juta dana 1MDB kepada Malaysia	1Malaysia Development Bhd (1MDB)	11
7	Rabu 15 April 2020	Kerajaan teruskan usaha dapatkan semula aset 1MDB	1Malaysia Development Bhd (1MDB)	13
8	Jumaat 17 April 2020	Kes cukai Najib: Permohonan LHDN ditangguh 5 Mei	Penolong Pengarah Unit Pemantauan LHDN Hisyamuddin Mohd Hassan	15
9	Selasa 21 April 2020	Wang Umno Kedah, Habib Jewel belum dipulangkan	Suruhanjaya Pencegahan Rasuah Malaysia (SPRM)	17
10	Selasa 28 April 2020	Keputusan lucut hak wang Jakel Trading ditangguhkan	1Malaysia Development Bhd (1MDB)	19
11	Rabu 29 April 2020	Hujahan kes dana SRC International bermula 1 Jun	SRC International Sdn Bhd	20



Riza Shahriz Abdul Aziz didakwa atas pertuduhan pengubahan wang haram RM1.25 bilion

1. AGC belum jawab representasi Riza Aziz semak tuduhan pengubahan wang haram

KUALA LUMPUR: Jabatan Peguam Negara (AGC) masih belum menjawab representasi yang dikemukakan Riza Shahriz Abdul Aziz untuk menyemak semula pertuduhan pengubahan wang haram AS\$248 juta (RM1.25 billion) berkaitan penyelewengan dana 1Malaysia Development Berhad (1MDB) yang dihadapinya.

Riza, 43, anak tiri bekas Perdana Menteri, Datuk Seri Najib Razak, menghantar representasi itu kepada AGC pada 18 November tahun lalu.

Peguam Riza, Datuk Hariharan Tara Singh berkata demikian ketika ditanya mengenai hasil representasi itu.

"AGC masih belum menjawab permohonan representasi anak guam saya," katanya melalui mesej WhatsApp hari ini.

Beliau juga berkata Mahkamah Sesyen telah menangguhkan prosiding pengurusan kes itu pada 5 Mei yang pada asalnya ditetapkan pada 6 April berikutan perlanjutan pelaksanaan Perintah Kawalan Pergerakan (PKP) oleh kerajaan.

"Pihak pembelaan menerima surat dari mahkamah hari ini, memaklumkan mahkamah menetapkan 5 Mei, pada 9 pagi untuk prosiding pengurusan kes itu," katanya.

Pada 9 Ogos tahun lalu, Hakim Rozina Ayob menetapkan perbicaraan pada Januari iaitu 6 hingga 9 dan 13 hingga 16, bagaimanapun tarikh itu dilapangkan kerana menunggu keputusan representasi itu.

Pada 5 Julai lalu, Riza, 43, pemilik syarikat Red Granite Pictures, mengaku tidak bersalah atas lima pertuduhan.

Bagi pertuduhan pertama, penerbit filem *Wolf of The Wall Street* itu didakwa telah membabitkan diri dalam pengubahan wang haram iaitu menerima hasil daripada aktiviti haram berjumlah AS\$1,173,104 melalui satu transaksi pemindahan wang daripada akaun milik Good Star Limited di RBS Coutts, Zurich, Switzerland ke akaun City National Bank, Los Angeles, Amerika Syarikat milik Red Granite Productions Inc.

Wang berkenaan didakwa hasil penyelewengan dana 1MDB.

Dia dituduh melakukan kesalahan itu antara 12 April dan 12 Mei 2011 di City National Bank, Los Angeles Main, Amerika Syarikat.

Riza, anak Datin Seri Rosmah Mansor hasil perkahwinan terdahulu, dituduh melakukan kesalahan sama membabitkan AS\$9 juta melalui transaksi pemindahan wang daripada akaun serupa pada 10 September 2012 dan 10 Oktober 2012 di tempat sama.

Bagi pertuduhan ketiga dan keempat, dia didakwa melakukan perbuatan sama membabitkan jumlah AS\$133 juta dan AS\$60 juta melalui satu transaksi pemindahan wang daripada akaun milik Aabar Investment PJS Limited di BSI SA, Lugano, Switzerland ke akaun BSI Bank Limited Singapura milik Red Granite Capital Ltd.

Dia dituduh melakukan kesalahan itu di BSI Ltd, Singapura pada 18 Jun 2012 dan 23 Oktober 2012.

Mengikut pertuduhan kelima, tertuduh didakwa melakukan kesalahan serupa berjumlah AS\$45 juta di tempat sama pada 14 November 2012.

Pertuduhan mengikut Seksyen 4(1) (a) Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 dan boleh dihukum mengikut Seksyen 4(1) akta sama.

Jika sabit kesalahan, Riza boleh didenda maksimum RM5 juta atau penjara maksimum lima tahun atau kedua-dua.



Bekas Perdana Menteri, Datuk Seri Najib Razak hadir ke Mahkamah Tinggi Kuala Lumpur bagi menghadiri prosiding pertuduhan rasuah dan pengubahan wang haram dana 1MDB pada 13 Mac 2020.

2. Perbicaraan kes 1MDB Najib bersambung 15 April

KUALA LUMPUR: Perbicaraan kes berprofil tinggi membabitkan bekas Perdana Menteri, Datuk Seri Najib Razak yang menghadapi pertuduhan rasuah dan pengubahan wang haram membabitkan dana RM2.3 bilion milik 1Malaysia Development Berhad (1MDB) ditangguhkan sekali lagi.

Timbalan Pendakwa Raya, Ahmad Akram Gharib, berkata perbicaraan itu yang sepatutnya didengar semalam di hadapan Hakim Mahkamah Tinggi, Collin Lawrence Sequerah ditangguhkan ke 15 April berikutan pelanjutan pelaksanaan Perintah Kawalan Pergerakan (PKP).

"Kami menerima e-mel dari mahkamah pada 30 Mac memaklumkan perbicaraan akan bermula pada 15 April," katanya kepada Bernama melalui mesej WhatsApp hari ini.

Mahkamah sebelum ini menetapkan perbicaraan pada Mac iaitu 2-13, 19-20, 23-27 dan 30-31; serta 1-30 April; dan Mei pada 4-8 dan 11-22 termasuk hari Jumaat untuk perbicaraan kes 1MDB.

Mahkamah juga menetapkan sepanjang bulan Jun, Julai, Ogos, September dan Oktober termasuk hari Jumaat untuk perbicaraan kes itu.

Apabila perbicaraan itu bersambung semula, pasukan pembelaan diketuai Tan Sri Muhammad Shafee Abdullah dijangka meneruskan pemeriksaan balas ke atas saksi kesembilan pihak pendakwaan, bekas

Ketua Pegawai Eksekutif 1MDB Datuk Shahrol Ibrahim Halmi, yang telah memberi keterangan sejak 23 September tahun lalu.

Najib, 67, berdepan empat pertuduhan iaitu menggunakan kedudukan beliau untuk memperoleh suapan berjumlah RM2.3 bilion dana 1MDB dan 21 pertuduhan pengubahan wang haram membabitkan jumlah yang sama.



Tan Sri Mohd Isa Abdul Samad.

3. Hujahan kes rasuah Isa Samad ditangguh ke 21 April

KUALA LUMPUR: Hujahan kes bekas Pengurus Felda, Tan Sri Mohd Isa Abdul Samad, yang menghadapi satu pertuduhan pecah amanah dan sembilan pertuduhan menerima rasuah, berjumlah lebih RM3 juta, yang sepatutnya didengar Rabu ini di Mahkamah Tinggi di sini, ditangguhkan.

Timbalan Pendakwa Raya, Afzainizam Abdul Aziz yang mengendalikan pendakwaan memberitahu Bernama, pendengaran hujahan kes itu ditetapkan pada tarikh baharu iaitu 21 April ini.

Pertukaran tarikh itu susulan lanjutan tempoh Perintah Kawalan Pergerakan yang diumumkan oleh kerajaan baru-baru ini, bagi mengekang penularan wabak COVID-19.

Pada 14 Januari lalu, pihak pendakwaan menutup kes itu selepas 15 hari perbicaraan dengan 22 saksi dipanggil memberi keterangan di hadapan Hakim Mohd Nazlan Mohd Ghazali.

Mohd Isa, 71, menghadapi satu pertuduhan pecah amanah dan sembilan pertuduhan menerima rasuah berjumlah lebih RM3 juta, berhubung pembelian Merdeka Palace Hotel & Suites (MPHS) oleh Felda Investment Corporation Sdn Bhd (FICSB), yang didakwa dilakukan di Menara Felda, Platinum Park, Persiaran KLCC antara 29 April, 2014 dan 15 Dis, 2015.

Pertuduhan pecah amanah dibuat mengikut Seksyen 409 Kanun Keseksaan yang memperuntukkan hukuman penjara maksimum 20 tahun dan sebatan dan boleh dikenakan denda, jika sabit kesalahan.

Sementara pertuduhan rasuah adalah mengikut Seksyen 16(a)(A) Akta Suruhanjaya Pencegahan Rasuah Malaysia 2009 dan boleh dihukum mengikut Seksyen 24(1) akta sama, yang memperuntukkan hukuman penjara maksimum 20 tahun dan denda tidak kurang lima kali ganda jumlah atau nilai suapan atau RM10,000 mengikut yang mana lebih tinggi, jika sabit kesalahan.



Ahli Parlimen Pontian, Datuk Seri Ahmad Maslan

4. Kes mahkamah Ahmad Maslan ditangguh ke 15 April

KUALA LUMPUR: Mahkamah Sesyen di sini, hari ini akan menetapkan tarikh baharu bagi mendengar permohonan Ahli Parlimen Pontian, Datuk Seri Ahmad Maslan untuk membatakan pertuduhan pengubahan wang haram dan memberi pernyataan palsu yang dikenakan ke atasnya.

Peguam Hamidi Mohd Noh, yang mewakili Ahmad, 52, memberitahu Bernama bahawa mahkamah telah menangguhkan pendengaran permohonan itu, berikutan lanjutan Perintah Kawalan Pergerakan (PKP) oleh kerajaan.

"Pihak pembelaan menerima e-mel dari mahkamah memaklumkan bahawa mahkamah telah menetapkan 15 April untuk pengurusan kes bagi kedua-dua pertuduhan utama Ahmad dan permohonannya untuk membatakan tuduhan itu," katanya menerusi mesej WhatsApp.

Permohonan itu sepatutnya didengar hari ini di hadapan Hakim Azman Ahmad.

Bagi pertuduhan pertama, Ahmad didakwa telah membabitkan diri dalam pengubahan wang haram dengan cara tidak melaporkan pendapatan sebenar berjumlah RM2 juta yang diterima daripada bekas Perdana Menteri Datuk Seri Najib Tun Razak kepada Lembaga Hasil Dalam Negeri (LHDN) dalam Borang Nyata Cukai Pendapatan Bagi Tahun Taksiran 2013 yang bertentangan dengan Seksyen 113(1)(a) Akta Cukai Pendapatan 1967.

Bekas Timbalan Menteri Kewangan itu didakwa telah menerima wang itu daripada Najib, yang dipercayai sebagai hasil daripada aktiviti yang menyalahi undang-undang, melalui cek AmIslamic Bank


Berhad bertarikh 27 Nov 2013, dan cek itu telah ditunaikan sendiri oleh Ahmad, pada hari yang sama.

Kesalahan itu didakwa dilakukan di LHDN, Cawangan Duta, Kompleks Pejabat Kerajaan, Jalan Tuanku Abdul Halim pada 30 April, 2014.

Pertuduhan dikemukakan mengikut Seksyen 4(1)(a) Akta Pencegahan Pengubahan Wang Haram dan Pencegahan Pembiayaan Keganasan 2001 yang membawa hukuman denda tidak melebihi RM5 juta atau penjara maksimum lima tahun atau kedua-duanya sekali, jika sabit kesalahan.

Bagi pertuduhan kedua, Ahmad didakwa telah memberi penyataan-penyataan palsu kepada Suruhanjaya Pencegahan Rasuah Malaysia (SPRM) semasa percakapannya dirakam oleh pegawai penyiasat SPM iaitu Ketua Penolong Kanan Pengguna Mohd Zairi Zainal, berhubung isu itu di bilik sidang media, Bangunan Parlimen, Jalan Parlimen, di sini antara 2.45 petang hingga 3.30 petang pada 4 Julai 2019.

Pertuduhan itu dibuat mengikut Seksyen 32(8)c) Akta Pencegahan Pengubahan Wang Haram yang membawa hukuman denda tidak melebihi RM3 juta atau penjara maksimum lima tahun atau kedua-duanya, jika sabit kesalahan.



5. PKP: Bicara kes 1MDB Najib ditangguh

KUALA LUMPUR: Perbicaraan kes berprofil tinggi membabitkan bekas Perdana Menteri, Datuk Seri Najib Razak, yang menghadapi pertuduhan rasuah dan pengubahan wang haram membabitkan dana RM2.3 bilion milik 1Malaysia Development Berhad (1MDB), ditangguhkan sekali lagi.

Timbalan Pendakwa Raya, Ahmad Akram Gharib, berkata perbicaraan yang sepatutnya bersambung Rabu ini di hadapan Hakim Mahkamah Tinggi Collin Lawrence Sequerah, ditangguhkan ke 29 April susulan lanjutan Perintah Kawalan Pergerakan (PKP).

Mahkamah itu sebelum ini menetapkan tarikh perbicaraan pada Mac iaitu 2-13 Mac, 19-20 Mac, 23-27 Mac dan 30-31 Mac kepada 1 hingga 30 April dan Mei iaitu 4-8 Mei dan 11 hingga 22 Mei termasuk Jumaat.

Tarikh lain perbicaraan yang ditetapkan adalah sepanjang Jun, Julai, Ogos, September dan Oktober, termasuk Jumaat.

Apabila perbicaraan bersambung semula, pasukan pembelaan diketuai Tan Sri Muhammad Shafee Abdullah dijangka meneruskan pemeriksaan balas ke atas saksi kesembilan pihak pendakwaan, bekas Ketua Pegawai Eksekutif 1MDB, Datuk Shahrol Azral Ibrahim Halmi, yang memberi keterangan sejak 23 September tahun lalu.

Najib, 67, berdepan empat pertuduhan iaitu menggunakan kedudukan beliau untuk memperoleh suapan berjumlah RM2.3 bilion dana 1MDB dan 21 pertuduhan pengubahan wang haram membabitkan jumlah sama.



Jabatan Kehakiman (DoJ) Amerika Syarikat memulangkan AS\$300 juta yang diseleweng daripada dana 1MDB.

6. AS pulangkan AS\$300 juta dana 1MDB kepada Malaysia

WASHINGTON: Jabatan Kehakiman (DoJ) Amerika Syarikat (AS) memulangkan AS\$300 juta yang diseleweng daripada dana 1Malaysia Development Berhad (1MDB).

Mei tahun lalu, AS mula memulangkan dana yang berjaya ditemui semula, membabitkan bayaran pertama hampir AS\$200 juta (RM836 juta)

Jabatan Kehakiman dalam kenyataannya, berkata ia menjadikan jumlah keseluruhan wang yang dipulangkan sebanyak RM2.6 bilion (AS\$600 juta).

Pembantu Peguam Negara AS, Brian A. Benczkowski, berkata pembayaran itu mencerminkan komitmen AS kepada Malaysia untuk memburu, merampas dan memulangkan aset yang diperoleh menerusi penyelewengan itu.

Antara aset yang berjaya diperoleh semula termasuk estet mewah di Beverly Hills, New York dan London serta pelaburan bernilai jutaan Dollar yang dilakukan oleh ahli perniagaan dalam buruan Low Taek Jho atau Jho Low.

Sebelum ini, berita Agensi yang memetik maklumat sumber, melaporkan DoJ menangguhkan pemulangan AS\$240 juta (RM1 bilion) susulan ketidaktentuan politik berikutnya peletakan jawatan Perdana Menteri oleh Tun Dr Mahathir Mohamad pada 24 Februari lalu.



Menteri Kewangan, Tengku Datuk Seri Zafrul Tengku Abdul Aziz

7. Kerajaan teruskan usaha dapatkan semula aset 1MDB

PUTRAJAYA: Kerajaan akan terus berusaha untuk memperoleh semula aset berkaitan 1Malaysia Development Bhd (1MDB) dan memberikan kerjasama sepenuhnya kepada semua pihak dalam memastikan keberhasilan daripada usaha-usaha ini pada masa hadapan.

Menteri Kewangan, Tengku Datuk Seri Zafrul Tengku Abdul Aziz, berkata berikutan pengumuman Perdana Menteri, Tan Sri Muhyiddin Yassin hari ini, Kementerian Kewangan mengesahkan penerimaan pemulangan AS\$300 juta daripada kerajaan Amerika Syarikat (AS) kepada kerajaan Malaysia.

Jumlah ini katanya, mewakili dana yang diperoleh semula daripada penyitaan, pelucutan hak atau pencairan aset berkaitan 1MDB.

"Sejak usaha-usaha memperoleh semula aset 1MDB dimulakan pada Jun 2018, Malaysia telah menerima AS\$620 juta daripada AS, yang merangkumi AS\$57 juta daripada hasil penyelesaian bersama Red Granite Pictures (dikredit pada Mac 2019); AS\$137 juta daripada hasil jualan kepentingan Jho Low di dalam Hotel Park Lane (dikredit April 2019);

"AS\$126 juta daripada jualan kehakiman kapal mewah, Equanimity, oleh Mahkamah Admiralti Malaysia (hasil dikredit ke dalam akaun amanah pada Disember 2019) dan AS\$300 juta (dikredit April 2020) kepada Malaysia.

"Pemulangan AS\$300 juta yang terkini terdiri daripada wang atau aset berkaitan 1MDB yang telah diperoleh semula, dilupus hak oleh, atau diserahkan balik secara sukarela kepada Jabatan Keadilan (DOJ) AS," katanya dalam kenyataan hari ini.

Tengku Zafrul berkata, beliau berterima kasih kepada kerajaan AS serta DOJ di atas usaha mereka dalam memperoleh semula aset-aset berkenaan yang sememangnya adalah hak rakyat Malaysia.

Bagi pihak kerajaan katanya, beliau juga ingin mengucapkan penghargaan kepada Kedutaan AS di Kuala Lumpur, khususnya kepada Duta Kamala Shirin Lakhdir, yang bekerjasama rapat dengan Kementerian Kewangan dan Jabatan Peguam Negara dalam beberapa minggu terakhir ini.

"Semangat kolaboratif yang wujud dalam proses rundingan kami memastikan segala rintangan dapat diatasi dalam memudahkan pemulangan wang tersebut kepada rakyat Malaysia.

"Kerajaan juga ingin mengiktiraf sokongan yang dipanjangkan daripada rakan sejawat kami di beberapa negara lain kerana telah membantu Malaysia dalam memperoleh semula aset berkaitan 1MDB ini.

"Usaha memperoleh semula aset berkaitan 1MDB masih berterusan dan Kementerian Kewangan akan terus memberikan kerjasama yang sepenuhnya kepada kesemua entiti penyiasat domestik dan antarabangsa dalam memastikan keberhasilan positif yang sama

dari pada usaha-usaha ini pada masa hadapan," katanya.

**Ibu pejabat Lembaga Hasil Dalam Negeri****8. Kes cukai Najib: Permohonan LHDN ditangguh 5 Mei**

KUALA LUMPUR: Mahkamah Tinggi di sini, menetapkan tarikh baharu untuk mendengar permohonan Lembaga Hasil Dalam Negeri (LHDN) bagi mendapatkan penghakiman terus berhubung saman dikemukakan terhadap bekas Perdana Menteri Datuk Seri Najib Tun Razak bagi menuntut cukai pendapatan berjumlah RM1.69 bilion.

Peguam, Muhammad Farhan Muhammad Shafee, yang mewakili Najib, berkata sesi pendengaran sepatutnya berlangsung hari ini, namun ditangguhkan ke 5 Mei berikutan lanjutan Perintah Kawalan Pergerakan (PKP) oleh kerajaan.

"Pendengaran akan berlangsung pada pukul 2.30 petang di hadapan Hakim Datuk Ahmad Bache," katanya kepada BERNAMA menerusi aplikasi WhatsApp, hari ini.

Penghakiman terus adalah kes diputuskan melalui hujahan tanpa mendengar keterangan saksi pada perbicaraan.

Pada 28 Feb lepas, mahkamah menolak permohonan Najib bagi menangguhkan prosiding saman LHDN terhadapnya untuk membayar cukai pendapatan berjumlah RM1.69 bilion, sementara menunggu rayaannya berhubung taksiran cukai kepada LHDN.

Pada 8 Ogos tahun lepas, Najib, memfailkan permohonan untuk menangguhkan prosiding saman oleh LHDN, namun LHDN dalam afidavit sokongannya berkata, Najib masih perlu membayar jumlah RM1.69 bilion itu walaupun beliau telah memfailkan rayuan berhubung taksiran cukai itu.

Penolong Pengarah Unit Pemantauan LHDN Hisyamuddin Mohd Hassan, dalam afidavit sokongannya, berkata mengikut Seksyen 103 Akta Cukai Pendapatan 1967, semua cukai yang ditaksir perlu dibayar pada hari notis taksiran diserahkan, sama ada orang itu mengemukakan rayuan atau sebaliknya berhubung taksiran cukai.

Pada 25 Jun 2019, kerajaan menerusi LHDN, menyaman Ahli Parlimen Pekan itu dan menuntut beliau membayar RM1.69 bilion bagi cukai pendapatan yang belum dibayar, kadar faedah lima peratus setahun dari tarikh penghakiman, kos dan relief lain yang difikirkan sesuai oleh mahkamah.



9. Wang Umno Kedah, Habib Jewel belum dipulangkan

KUALA LUMPUR: Wang milik Badan Perhubungan UMNO Negeri Kedah dan Habib Jewel Sdn Bhd masing-masing berjumlah RM1.05 juta dan RM100,000, yang dirampas Suruhanjaya Pencegahan Rasuah Malaysia (SPRM), masih belum dipulangkan kepada entiti terbabit disebabkan permohonan penangguhan oleh pihak pendakwaan.

Perkara itu disahkan Timbalan Pendakwa Raya Abdul Rashid Sulaiman, ketika dihubungi Bernama hari ini.

"Wang itu masih belum diserahkan kepada mereka (Umno Kedah dan Habib Jewels)," katanya ketika ditanya mengenai kedudukan wang berkenaan.

Dua entiti terbabit didakwa telah menerima wang daripada bekas perdana menteri Datuk Seri Najib Tun Razak, yang dipercayai berkaitan dengan skandal 1Malaysia Development Berhad (1MDB).

Sementara itu, Timbalan Pendaftar Mahkamah Tinggi Mahyuddin Md Som, berkata mahkamah menetapkan hari ini sebagai pengurusan kes permohonan pihak pendakwaan untuk penangguhan perintah Mahkamah Tinggi, yang menolak permohonan bagi melucut hak ke atas wang berjumlah RM1.15 juta.

Wang itu adalah jumlah yang disita daripada dua entiti berkenaan, namun ditangguhkan berikutkan pelanjutan Perintah Kawalan Pergerakan (PKP) oleh kerajaan.

"Mahkamah menetapkan tarikh 9 Jun untuk pengurusan kes selanjutnya. Saya sudah memaklumkan perkara itu kepada kedua-dua pihak melalui e-mel," katanya.

Pada 13 Disember tahun lalu, Hakim Mohd Nazlan Moh Ghazali menolak permohonan kerajaan untuk melucut hak harta berkenaan, berdasarkan pihak pendakwaan gagal untuk membuktikan kes pelucutan hak terhadap kedua-dua entiti itu.

Pada 16 Disember tahun lalu, kerajaan turut memfailkan rayuan terhadap keputusan Hakim Mahkamah Tinggi.

Jun tahun lalu, SPRM memfailkan perlucutan hak harta terhadap 41 entiti, yang terdiri daripada individu, syarikat dan parti politik, di bawah Akta Pencegahan Pengubahan Wang Haram dan Pencegahan Pembiayaan Keganasan bagi mendapatkan semula RM270 dana berkaitan 1MDB.

SPRM percaya wang berkenaan dipindahkan daripada akaun Najib.



10. Keputusan lucut hak wang Jakel Trading ditangguhkan

KUALA LUMPUR: Keputusan terhadap permohonan kerajaan untuk melucut hak wang berjumlah RM628,314, yang didakwa berkaitan dengan skandal 1Malaysia Development Berhad (1MDB) daripada Jakel Trading, yang dijadual berlangsung hari ini di Mahkamah Tinggi, di sini, ditangguhkan.

Peguam mewakili Jakel Trading, Thevini Nayagam memberitahu keputusan permohonan itu sepatutnya disampaikan oleh Pesuruhjaya Kehakiman Datuk Ahmad Shahrir Mohd Salleh hari ini, tetapi ia ditangguhkan dan tarikh baharu akan ditetapkan kemudian.

"Kami masih belum dimaklumkan mengenai sebarang tarikh baharu," katanya melalui pesanan WhatsApp.

Pada Jun tahun lalu, Suruhanjaya Pencegahan Rasuah Malaysia (SPRM) memfailkan saman pelucutan hak terhadap 41 entiti yang terdiri daripada individu, syarikat dan parti politik, di bawah Akta Pencegahan Pengubahan Wang Haram dan Pencegahan Pembiayaan Keganasan untuk memperoleh semula dana kira-kira RM270 juta yang dipercayai mempunyai kaitan dengan 1MDB.

SPRM percaya wang berkenaan dipindahkan secara tidak sah daripada akaun bank bekas Perdana Menteri Datuk Seri Najib Tun Razak.



Bekas Perdana Menteri, Datuk Seri Najib Razak, ketika hadir di Mahkamah Tinggi Kuala Lumpur, Mac lalu.

11. Hujahan kes dana SRC International bermula 1 Jun

KUALA LUMPUR: Mahkamah Tinggi di sini menetapkan tiga hari bermula 1 Jun depan, untuk mendengar hujahan kes berhubung dana SRC International Sdn Bhd yang dihadapi bekas Perdana Menteri, Datuk Seri Najib Razak.

Timbalan Pendakwa Raya ad hoc, Datuk V Sithambaram, memberitahu Bernama bahawa tarikh ditetapkan sebelum ini untuk hujahan lisan itu pada 18 hingga 20 Mei depan, telah dilapangkan.

Beliau berkata, mahkamah juga menetapkan 5 Mei depan untuk pihak pembelaan dan pendakwaan memfailkan hujahan bertulis mereka, manakala 19 Mei bagi menjawab hujahan bertulis itu.

"Sebelum ini, mahkamah menetapkan 28 April bagi kami memfailkan hujahan bertulis tetapi dijadualkan semula selepas mahkamah membenarkan permohonan pihak pembelaan untuk lanjutan masa susulan Perintah Kawalan Pergerakan (PKP)," katanya.

Pada 11 Mac lalu, pihak pembelaan menutup kesnya setelah memanggil 19 saksi dalam perbicaraan yang berlangsung selama 33 hari bermula 3 Disember tahun lalu.

Ahli Parlimen Pekan itu menjadi saksi pertama pembelaan.

Sebelum itu, 57 saksi dipanggil memberi keterangan pada peringkat kes pendakwaan.

Pada 11 November tahun lalu, Najib diperintah membela diri terhadap tujuh pertuduhan menyalahgunakan RM42 juta dana SRC International, iaitu tiga pertuduhan pecah amanah (CBT), tiga pertuduhan pengubahan wang haram dan satu pertuduhan menyalahgunakan kedudukannya berkaitan dana SRC International.